

1 Sulat Pamanduh ni si Timoti

Pahati

Assalamu Aleykum Warahmatullahi Taala Wabarakatuh. Itu dabahagih Kitab Injil leh nulat leh si Paul, dikayuh wakil Seydina Isa Al-Masih Aleyhis-selam. Ya áa pinabeyaan leh si Paul, ya na si Timoti, dikayuh ábey tabowa leh si Paul meyah ma Al-Masih. Si Timoti tu, bey paheya ma lahat Asiya, ya na nionan Turki ma beteh naan. Mmah-na bangsa Grik, ati inah-na maka mboh-na, bangsa Yahudi. Mboh-na maka inah-na ya na bey maadjih íya kitab min bey karikih-dikih-na gih. Si Timoti tu siyali min si Paul, maka addat-na paiyah. Sugah ley iya meyah ma si Paul magnasihah amanat Al-Masih. Bang tau na si Timoti magnasihah maka manduh, ley iya nitahambanan leh si Paul ma दौर Ipesos manduh maka ngimam ma jamaa miili. Toggol-toggol, ley takoonan leh si Paul niyah saga aa ma jamaa Ipesos magpanduh anu mba bannal. Sugah, maha iya makapiilu mabontol siga, sabab ley iya nijil leh parinta ma lumah-na sababan leh pagnasihah-na amanat Al-Masih. Hangkan na, ley sidja sulatan-na si Timoti sinohoh masampey panduh-na ni jamaa.

Ma sulat itu heka takoonan-tabi aturan bang beteh ingga subey addat-tabiát saga karandahan maka kalallahan ma jamaa, bang bateh ingga leh meneh saga imam maka nakurah, maka bateh ingga sab subey panabang-ta ni saga ábalu maka saga ákalulangan. Muramurahan heya rahmat ma sagannap ámassa min ikhlas pangateyan-na.

Jud 1

Panalam

¹Assalamu aleykum. Sulat itu min ikhlas pangateyan-ku si Paul, dikayuh wakil si Isa Al-Masih masaplag amanat-na. Ya maksud-ku tu min panohoan dikowh-kowh Tuhan ya na poonan kalappasan-tabi, maka min panohoan si Isa Al-Masih ya na agaran-tabi.

²Kau Timoti, niat-ku bateh dikayuh anak-ku lahasiyah ma Al-Masih. Mura-murahan kow nikaasehan maka nirahmatan leh Tuhan ya na pag-mmaan-tabi ma sulgah, maka leh Panghuh-tabi si Isa Al-Masih. Maka bang peen niyah kasannangan atey-nu!

Maghallih ma panduh mba niyah kabontolan-na

³Entomun bey panohoan-ku ma kau waktu bey patulak-ku piitu ni Makidun. Bey kow asal soho-ku tamban miilu ma jamaa दौर Ipesos supaya talangan-nu saga ámanduh anu mba niyah kabontolan-na. ⁴Daa siga sohoun ngahinang pali-pali min salsila saga kamboh-

mboan pangkat-mamangkat. Sabab min dili, tabowa jamaa maglugat, maka maha patottog pagparatsaya maka pagtaat-siga ma Tuhan. ⁵Ya maksud panohoan-ku tu supaya min pikilan sussi, min katottogan pagparatsaya maka min ikhlas pangateyan-siga magkasi-lasa. ⁶Sugah karencehean seheh-tabi mba na maruli panduh itu. Ley na siga meyah ni panduh maha niyah kapusan-na. ⁷Ya kabilahihan-siga taonan guru sarah agama. Pangannal-siga jukup na panghati maka pamanduh-siga. Sugah sa bannal-na, maha niyah panghati-siga ma Palman Tuhan.

⁸Na pasalan sarah Tuhan, katoonan-ta asal hap, ati makabuwan kahapan gih bang tatuman-ta maksud-na. ⁹Katoonan-tabi du sab ya patudjuhan sarah sikeyya ni saga ábontol, sugah ni saga ábengkok pikilan-siga, beteh na saga ángalanggal sarah parinta, saga ábulaug, saga aa mba magmahal-tabat ma Tuhan, saga ábaldusa, saga aa maha mag-agama, saga ámissara kupul, maka saga ámonoh mattoa-siga atawa pagkahi-siga manusiyah. ¹⁰Ya du sab ni saga aa magjina atawa maghinang kajowlakaan maka pagkahi-siga, saga ángidnap maka saga ádustaan atawa naksian anu mba bannal. Ya du sab ni seyyan-seyyan maghinang anu tagga ma panduh ni kasabannalan ¹¹atawa ma amanat hap ya bey pangandol ma aku leh Tuhan Barakatan.

Pagsarangsukul

¹²Heya pagsarangsukul-ku ni Panghuh-tabi si Isa Al-Masih sabab ley aku tapangandolan-na nihinang dikayuh sasohoan-na. Sampey ley gih aku pakosog-na numan panohoan-na. ¹³Sabannal-na, ma waktu bey palabey-labey, aku tu dikayuh ábey naggaan íya. Bey gih nilimutan maka nipakaat leh ku saga aa-na.* Sugah minsan du bateh ili, ley du aku kaasean-na pasal mba gih bey aku magparatsaya. Maha bey tasayu-ku dusa hati kahinangan-ku sih. ¹⁴Sabannal-na, heya toongan tabang-na ma aku. Sampey ley aku buwanan-na iman maka aseh-lasa bilang dikayuh ámeyah ma iya.

¹⁵Bannal maka wajib kinahagad pinagbahasa, ya yuk-na: “Ya maksud bey papiitu Al-Masih ni dunya, supaya ngalappasan ádusahan.” Ná, bang takdil ni aa dusahan, maha

*01:13 Bandingun maka Kawakilan jud 9, ayat 1 sampey 30.

niyah paliyu min aku. ¹⁶Min ditu du sab sababan hangkan aku ley kaasean-na, supaya aku tahinang-na dikayuh suntuan bang bateh ingga heya sabal-na ma manusiyah. Hati-na, minsan gih beteh ingga heya dusa-tabu, bang sidja kitabi meyah ma pangulbanan-na, tabuwanan du inyawa-tabu kasampulnaan salama-lama.

¹⁷Puji-ta dikowh-kowh Tuhan

Sultan ni kasaumulan

Anggil-na maha tapandaan

Ruhul-na maha niyah katangbusan

Wajib nipuji maka nisanglitan

Sampey ni kasaumulan

Amin

Panohoan ma si Timoti

¹⁸Ná Timoti, bilang dikowh taniyat-ku anak, niyah gih panohoan-ku ma kau: entomun saga amanat bey pinasampey min Tuhan ma waktu-nu bey kawakilan. Beyaun itu paháp supaya taraug-nu kalaatan. ¹⁹Patottogun iman-nu maka pasussihun pangateyan-nu. Daa beyain addat ákarenehean ya bey neykutan panduh itu, sampey ley lopus pagkahagad-siga. ²⁰Beteh na si Himinos maka si Iskandal ya ley meyah ma panduh panglima kaseytanan nionan si Ibiris. Hangkan ley siga pasagaran-ku tasatsat maka ma jom katiksaan, supaya min dili tapintang-siga maha na missara sangka pasalan Tuhan.

Jud 2

Panduh pasal pagsumbahayang

¹Ya umbul satu, ebot-ebot pataptap kam ngamuh duwaa maka nukbar pagharangksukul ni Tuhan. Damikiyan subey amuan-bi duwaa kamemon manusiyah ²beteh na baanan sultan maka saga aa taga kawasa, supaya niyah kasannangan maka kabontolan ma paglahat, maka supaya maha kitabi nilangan magmahaltabat atawa magtaat ni Tuhan. ³Pagduwaa beteh ilu ya na addat háp katowwaan leh dikowh-kowh Tuhan ya na poonan kalappasan-tabu. ⁴Sabab kabilahihan-na kamemon manusiyah talappasan maka magkahagad ma panduh ni

kasabannalan. ⁵⁻⁶Dikowh-kowh Tuhan-tabi. Maka dikowh-kowh du sab ámakabowa manusiyah pakiyampun ni Tuhan, ya na si Isa Al-Masih. Ma waktu bey takdil ma iya numan maksud Tuhan, ley iya minjari manusiyah supaya tahinang pangulbanan-tabi. Min ditu, katoonan-tabi bang beteh ingga talakkat-na manuisyah min dusa maka min hukuman kamatey. ⁷Ya na itu sababan hangkan aku ley tawakilan leh si Isa magnasih ni saga aa sikeyya bangsa Yahudi, supaya du sab siga magkahagad ma panduh ni kasabannalan. (Bannal pangahaka-ku tu, mba aku ngandustah).

Panduh ni saga kalallahan maka karandahan

⁸Ná, ya panohoan-ku ni kalallahan ma sagannap jamaa - min pangateyan sussi subey siga pataptap ngamuh duwaa. Subey maha niyah maglugat atawa malán panas-atey. ⁹Ya panohoan-ku sab ni karandahan, subey magbadjuh paháp maka pahempot. Subey maha kalanduh pag-ari-ari ma buon maka ma baran-siga, beteh na mussah atawa bulawan atawa pakeyan halgaan. ¹⁰Gom peen ya isbat-siga hinang tudju ni kahapan ya na katowpan ma danda magtaat pakosog ni Tuhan. ¹¹Ma waktu pagsumbahayang, saga karandahan mba sinohoh bukag. Subey siga pahantap maka pakale paháp. ¹²Mba sohoh-ku palabi kapatut karandahan min kalallahan. Bang siga maglamud, lalla ya subey manduh. Ati karandahan pakale sidja. ¹³Ya dikowh pamintangan-tabi pasalan Mboh Adam. Iya bey dahuh pinalahil, simbohoh Mboh Hawa. ¹⁴Ati sikeyya Mboh Adam ya bohoh-bohoh taakkalan leh Ibris. Sugah Mboh Hawa ya ley taakkalan sampey ley makadusa. ¹⁵Min dili, kamemon karandahan kalabey tiksah waktu-siga nganak. Sugah talappasan du sab siga bang taptap magparatsaya, magpasussi, malán pikilan hap, maka magkasi-lasa ma pagkahi-siga manusiyah.

Jud 3

Pameneh saga ámagnakurah ma jamaa

¹Bannal ya pinagbahasa ya yuk-na, “Hap toongan maksud aa magniyat tahinang imam.”
²Bang niyah aa tahinang imam, subey maha niyah panulangan ma addat-na. Subey iya patottog ma nda-na, tottog maka bontol pikilan-na, tapangandolan, pinag-addatan,

pangasip maka tau manduh. ³Subey iya mba palango atawa panas pangateyan-na. Gom peen subey deyh pangateyan-na maka mba bangngis atawa hawahan. ⁴Subey iya tau mowa saga aa ma okoman-na, sampey saga anak-na magkahagad maka mag-addat ma iya. ⁵Sabab beteh ingga leh-na mag-imam ma jamaa, bang anak-handa-na maha minsan tabowa-na? ⁶Iya tu subey ábey toggol na magparatsaya ma Al-Masih. Apa bang ábahau magparatsaya, sittau mag-abbu maka towwah hukuman gih beteh bey nowwah ma Ibris.* ⁷Subey du sab iya nipag-addatan leh saga manuisyah sikeyya Al-Masihin, supaya iya maha taudjuh-udjuh atawa taonan dusahan maka gana-gana taraug na leh Ibris.

⁸Ná, damikiyan du sab saga aa tapeneh nabang ma kaimaman, subey du sab áa nipag-addatan maka mba dustaan atawa palango. Ati ma ka-lluman-siga min hulas-sangsah, sikeyya min sisip atawa min hinang anu maha tagga. ⁹Subey du sab siga taptap min ikhlas maka sussi pangateyan-siga meyah ma panduh ni kasabannalan bey pinasampey leh Panghuh-tabi. ¹⁰Sagannap aa nipeneh, wajib nipariksah dahú. Bang maha niyah tandah panulangan ma iya, kajari na iya nabang ma kaimaman. ¹¹Arapun sab nda-na, subey du sab ánipag-addatan ma paglahat. Ati sikeyya pangalimut sugah tottog pikilan-na maka tapangandolan ma kamemon kahalalan.

¹²Ya aa tapeneh nabang ma kaimaman subey patottog ma nda-na, maka subey du sab tau mowa anak-na maka saga aa ma okoman-na. ¹³Bang hatul leh-na mowa hinang-na nabang ma kaimaman, song pasong kabantugan-na maka song pakosog pagparatsaya-na ma si Isa Al-Masih.

¹⁴Ná Timoti, toggol-na bey pagniyat-ku bilahi piilu ni kau. Sugah saltah mba gih aku makapiilu, sulat ku na sidja saga panohoan-ku ma kau. ¹⁵Supaya bang mba kasaut, asal takoonan-nu na bang bateh ingga subey addat-tabiati-tabi bilang jamaa palsukuan Tuhan maka bilang saga aa mogbogan amanat ni kasabannalan.

*3:6 Bandingun salsila Ibris ma Kitab Nabi Isayas jud 14, ayat 12 sampey 15. Si Ibris tu bey dikayuh Panglima malaikat heya kawasa-na. Sugah ley iya mag-abbu maka heka malaikat ley tabowa-na nulang Tuhan. Hangkan na siga leh maluwas leh Tuhan min diyatah langit, ley minjari seytan. Ma beteh naan, si Ibris ya na nakurah atawa Panglima kaseytanan.

¹⁶Tantu itu dikowh kainuhan agama-tabi maka lalom hatihan-na pasalan si Isa Al-Masih:

Bey palahil-na ámagbabaran
Ruhul Kudus kasaksihan
Sampey na kamalaikatan
Pinatanyag ni kabangsa-bangsahan
Pinaratsaya ma kalahat-lahatan
Ni langit pamolean.

Jud 4

Panohoan ma pasal kinakan

¹Asal ley na kita pinahatihan leh Ruhul Tuhan pasalan ma waktu sinong, heka manusiyah neykutan pagparatsaya-siga ma Al-Masih. Sampey taakkalan gih siga leh seytan meyah ma panduh maha niyah kasabannalan-na. ²Saga áa manduan siga bang ni-ndah, dolo áháp, sugah sabannal-na, ádustaan. Maha siga tau magtawbat atawa ngamuh kaampunan. ³Ma panduh-siga, maha sinohoh manusiyah maghalla atawa mag-nda. Ati karencehean kinakan nitagga leh-siga mba sinohoh nikakan. Sugah ma pangandah Tuhan, kamemon kinakan bey pamuwan-na subey nipagsarang-sukulan leh sagannap aa magsabannal ma amanat-na. ⁴Sabab kamemon bey pinapanjari leh Tuhan, háp sidja. Hangkan na subey nisambut maka nipagsarang-sukulan leh tabi. ⁵Sabab min pagduwaa-tabi maka min pagbassa Palman-na, itu tabarakatan-na.

Panduh ma si Timoti bilang sasohoan Tuhan

⁶Ná Timoti, bang tapasampey-nu panduh saga itu ni saga danakan-ta ma Al-Masih, itu dikowh tandah kau lu sasohoan-na háp sabab min bey pagtogos-nu ngadjian Palman Tuhan maka meyah ma panduh-na ni kasabannalan. ⁷Patá kow min saga pali-pali maka kata-kata saga tuhan-tuhan ya mba niyah pus-na. Ya pakosogun pagparatsaya-nu. ⁸Sabab bang ngkon baran-ta ya pinakosog, itu ma dunya sidja. Sugah bang ya pakosog-ta pagparatsaya, ya tungbas-na miitu ma dunya sampey ni akhil kiyama. ⁹Bannal ya pagbahasa tu maka

wajib nikahagad: ¹⁰Ya asahan-tabi dikowh-kowh Tuhan ya llum sampey ni kasaumulan. Ya na iya ngalappasan manusiyah, sagannap magkahagad. Hangkan kitabi magtuyuh-tuyuh mogbogan maka masampey amanat kasalamatan.

¹¹Na Timoti, kamemon saga anu iti subey pasampey-nu ni jamaa maka sohoun nibeyah. ¹²Minsan kow siyali min siga, niyah du kapatut-nu manduh. Min kowl-piil maka pahimung-mungan-nu, tahinang kow suntuan-siga bang beteh ingga leh siga magkasi-lasadangan ni dangan, magpataptap paratsaya maka magpasussi ni Tuhan.

¹³Satoggol-ku mba gih makapiilu, Palman Tuhan taptap nibassa, nipagnasihahat maka pamanduh-nu ni jamaa. ¹⁴Pakeyhun kapandeyan maka katau bey pinasampey ma amanat min Tuhan, waktu nu bey nipatannaan tangan leh kaimaman tandah kawakilan na kow.

¹⁵Ná, ebot-ebot min ikhlas pangateyan-nu magmohot-mohot kow meyah ma panduh saga itu sih, supaya tandah leh aa kamemon song pasong katau-nu maka kapandeyan-nu. ¹⁶Kamayah kow, pahapun addat-tabi-nu maka anu pamanduh-nu. Pataptap meyah ma panduh ni kasabannalan, supaya niyah kasampulaan inyawa-nu sampey na saga aa pagnasihatan-nu.

Jud 5

Panduh pasalan saga aa ma jamaa

¹Bang niyah lalla umulan gih min kau ma jamaa bohoh makasáh, daa pamung-mungin. Gom peen niyat-nu beteh dikowh mmah maka bowahun magbissara pahap. Saga kalallahan sab siyali min kau, subey niyat-nu beteh dikowh danakan. ²Damikiyan du sab karandahan umulan min kau, subey niyat-nu beteh dikowh inah. Saga karandahan anak bahau sab, niyatun dikowh siyali min pikilan maka pangateyan sussi.

³Saga karandahan balu ya maha na niyah kampung-siga, subey nipag-addatan maka pinadahú nitabang leh jamaa. ⁴Sugah bang niyah sab balu taga anak atawa taga mpu, siga ya na subey nabang maka malanjaan íya tandah dikowh tungbas ma mattoa-siga. Sabab ya na itu towp nihinang leh saga aa mag-ammal. Ati katowwaan du sab Tuhan ma karadjaan beteh ilu. ⁵Bang niyah balu maha na taga kampung, hati na, ya ngkon laasa asahan-na Tuhan. Ati taptap iya magsumbahayang llow-sangom ngamuh tabang ni Tuhan. ⁶Sugah

bang niyah sab balu ya ngandulan napsu-na maka ngkon isbat-na parasahan hap, minsan iya llum gih masi, ya kahalan-na beteh dikowh áa ley na matey maha niyah kasampulnaan inyawa-na.

⁷Ná, kamemon panohoan itu subey pasampey-nu ni jamaa, supaya mba niyah panulangan ma siga. ⁸Sabab bang niyah aa mba malanjaan rahasiyah-na labi awla na anak-handa-na, beteh du bey teykutan-na panduh Al-Masih. Addat beteh ili libbi gih min ákafir.

⁹Bang niyah balu magpalamud ma listahan supaya tabuwanan balanjah leh jamaa, umul-na subey labi nnompuh na. Maka subey du sab iya bey magdikayuh maka halla-na sampey ni kamatey-na. * ¹⁰Subey du sab tanyag bey hinang-na háp, beteh na pagpahilalah ma saga anak-na, paghulmat saga aa ni lumah-na, pag-isbat kagunahan jamaa maka pagtabang ma saga aa towwah kasigpitan. Hati-na, ginisan kahapan bey tahinang-na.

¹¹Saga balu anak-bahau subey mba nipabeyah ma listahan sabab bang masi gih kosog napsu-siga, bilahi siga maghalla pabalik. Hati-na takaypat-siga magtaat ma Al-Masih. ¹²Na nong siga makadusa bang mba na tatuman paljanjian-siga ma Al-Masih.* ¹³Dikayuh gih kasusahan bang siga tu nibuwanan balanjah, biyasa na siga mba maghinang. Ya ngkon hinang-siga maglunsul ni kalumah-lumaan ngalimut maka nagow-nagow ma hinang sikeya palsukuan-siga, maka missara anu maha niyah kapusan-na. ¹⁴Hangkan na, bang ma pikilan-ku, gom na siga maghalla pabing, bohoh siga nganak maka ngayura lumah-siga paháp supaya siga maha taudjuh-udjuh leh saga ánaggaan kitabi. ¹⁵Apa karencehean balu anak-bahau ley na neykutan panduh Al-Masih maka ley meyah ma panduh nakurah seytan.

¹⁶Na ebot-ebot gih ni saga karandahan Al-Masihin, bang niyah kampung-bi balu ma jom okoman-bi, daa kam ngasa-ngasa jamaa ya malanjaan siga. Wajib kaam na subey, supaya ya tabang min jamaa tapamuwan ni saga ábalu maha niyah kampung-siga.

¹⁷Subey heya pag-addat maka panirakka-tabu ni saga imam magnakurah ma jamaa, labi awla na bang hinang-siga magnasihah maka magpanduh. ¹⁸Beteh hatihan dikowh ayat min

*

^{5:12} Ya addat saga jamaa tu, bang niyah balu nibalanjaan leh jamaa, nganjanjih iya nabang ma kahinangan jamaa.

al-Kitab, ya yuk na, “Mba wajib nilangan kalbow mangan sinabu maghinang.”* Maka dikayuh sab ayat, “Bang aa maghinang, wajib nigajihan.”*

¹⁹Bang niyah aa nunah imam, daa magtuwi kahagarun-bi. Itu subey pariksah dahu. Bang niyah saksi duwa atawa tallu, bohoh kahagad-bi. ²⁰Bang bannal iya bey makadusa, palkalah itu subey nipahati ma mundaan jamaa maka subey iya nihakaan, supaya makabuwan pamintangan ma siga.

²¹Na sohohtata kam meyah ma kamemon panohoan itu. Daa pagbiddaun leh-nu ngintanan parkalah ma jamaa. Tuhan ya saksi-ta sampey si Isa Al-Masih maka saga malaikat. ²²Daa sohonoh-sohonoh meneh saga amagnakurah ma jamaa. Sabab bang aa tapeneh-nu ma jom dusa, sampey kau talapey. Ya pasussihun pikilan-nu maka pangateyan-nu.

²³Ná pagga daran konoh laat parasahan-nu, daa sidja boheh inum-nu, subey niyah du sab boheh anggul minsan laasa dangey taggok panambal bottong-nu maka pamakosog anggowtah-nu.

²⁴Bang kow menah aa magnakurah ma jamaa, itu ya subey entom-nu: niyah aa minsan mba nipariksah, asal katoonan na ma jom pagdusa maka mba patut nipeneh. Karenehean sab subey nipariksah paháp bohoh katoonan ma jom pagdusa. ²⁵Damikiyan du sab ma aa maghinang kahapan. Karenehean asal takoonan na, karenehean mba. Sugah tantu kinatoonan du kamemon bang nipariksah pahap.

Jud 6

Panduh ni saga ata

¹Bang niyah aa ma jamaa ya masi gih ma jom pag-atahan, subey hap addat-na ma papuh-na, supaya maha niyah makabissara laat pasalan Tuhan-tabi atawa panduh-tabi. ²Bang ya papuh-na dikayuh Al-Masih, mba kajari paglangan-langan-na maghinang sokat papuh-nu dikayuh danakan ma Al-Masih. Gom peen subey pagmohot-mohotan-na

*5:18 Kitab Tawrat, Panamban jud 25, ayat 4.

*5:18 Kitab Injil, Luk jud 10, ayat 7.

maghinang paháp sabab papuh-na naan dikayuh ámeyah ma Al-Masih maka nikalalahan leh Tuhan.

Panduh ni saga áa hawahan

³Na ya na ili subey pamanduh-nu maka paentom-nu ma siga. Bang niyah aa manduh anu siddi ya mba magtowwah maka panduh min Panghuh Isa Al-Masih tudju ni kasabannalan maka kabontolan, ⁴hati-na, aa ilu abbuhan maka kulang panghati-na. Ya ngkon kabilahihan-na magjawab maka maggagga pasalan hatihan bissara. Ma kahinapusan-na, mowa manusiyah magjingki-jingkihan, magsasa, magjampa maka ngulinahan aa kamemon. ⁵Sampey maglugat sidja na sabab takaat na pamikil-siga, maka maha na magkahagad ma panduh ni kasabannalan. Mag-ammal konoh sugah ya puhung-siga supaya magdaya. ⁶Maleyngkan ya bannal makadaya bang kitabi magtaat ni kasabannalan min pangateyan lillah ma panganggantah Tuhan. ⁷Sabab bey papiitu-tabi ni dunya tantang. Moleh ni ahirat tantang du sab. ⁸Hati-na, bang niyah na balanjah-tabi maka pamakey-makeyan, eyyan gih piha-ta? ⁹Bang niyah aa ya ngkon isbat-na magdaya, tantu tasatsat, taakkalan maka tabowa leh napsu-na. Ya na ilu makadupang maka makamula ma iya sampey maha niyah na kasampulnaan inyawa-na. ¹⁰Sabab napsu magdaya ya na poon-poon ginisan kalaatan. Hangkan karencehean ábey meyah ma jamaa-tabi lai na towwah balah sabab leh heya napsu-siga magdaya. Sampey panduh Al-Masih ley gih takeypat-siga.

Kahinapusan Bissara

¹¹Tuwan, bilang dikayuh sasohoan Tuhan, ebot-ebot patá kow min saga addat bateh ilu. Ya palánun addat bontol maka pag-ammal ni Tuhan, sabal maka iman, bowahan deyoh, maka aseh-lasa ni pagkahi-nu manusiyah. ¹²Pagmohot-mohotin hinang bey tawakilan ma kau, bateh bey panganjanjih-nu ma mundaan jamaa ya heka bey makakandah. Puspusin kosog-nu meyah ma Al-Masih sampey waktu makaabut inyawa-nu ni sulgah selama-lama.

¹³⁻¹⁴Na Timoti, soho ta-kow taptap meyah ma kamemon panduh itu sih. Ya saksi-ta Tuhan ya na muwan inyawa ma kamemon ummat-na, maka si Isa Al-Masih ya na bey mogbogan kasabannalan waktu-na bey nisumaldiya leh si Pontus Pilatu. Ebot-ebot maha

niyah paglangan-langan-nu meyah ma panohoan-siga sampey pabalik Panghuh Isa Al-Masih, ¹⁵ma waktu nitakdil leh Tuhan.

Ya na Tuhan Barakatan
Amagbayah-bayah katunggalan
Sultan min kasultanan
Datu min karatuan
¹⁶Llum ni kasaumulan
Ma sahaya maha tasekotan
Maha tandah atawa tapa-ndaan
Kabantugan maka kawasa-na
Haniyah katobtoban-na. Amin.

Panduh kinahapusan

¹⁷Ná, paemtomin saga ádayahan ma jamaa, subey mba mag-abbu atawa tikabbul. Subey du sab siga mba mangandol ma altah-siga sabab maha niyah katantuhan-na. Tuhan ya wajib pangandolan-tabi. Min daya-na, kamemon kagunahan-tabi tapamuwan-na supaya sannang pangateyan-tabi. ¹⁸Saga aa dayahan, sohoun makey daya-siga ni kahapan pagkahi-siga, sabab ya na ili daya maha niyah katobtoban-na. Subey siga maha keykit, sugah taptap sidja muwan maka mahagih radjidkih ni pagkahi-siga. ¹⁹Bang hinang-siga anu itu, nong paheya gih pahalalah-siga ma sulgah. Ya na ili altah mba tapakaat ya makabuwon kahapan maka ka-llum sampey ni kasaumulan ma jom sulgah.

²⁰Na Timoti, ebot-ebot bogbogin-bi kamemon panduh bey pangandol-ku ma kau. Patá kow min pagsuwal-jawab ya maha niyah kapusan-na maka min panduh mowa manusiyah maglugat. Ma pangannal ákarenehean, ya na ilu panduh ni katau, sugah mba bannal. ²¹Karenehean seheh-tabi lai na magkahagad ma panduh-siga, sampey ley gih takaypat-siga panduh Al-Masih.

Na mura-murahan kam nikarahmatan leh Tuhan.

Wassalam